

Inatsisissatut siunnersuummut nassuiaatit

Nassuiaatit nalinginnaasut

1. Aallaqqaasiut

Nuttarnerulersitsinissamut ikiorsiissutinik qinnuteqarnissamut periarfissat annertusineqarnissaannik kissaateqarneq aallaavigalugu allannguuteqartitsisoqarpoq.

Nunami namminermit suliffeqarnermik pilersitsinissamut sulisussat nunaqavissut maannakkornit nuttarsinnaanerulersinnissaat pisariaqarpoq. Inatsimmi allannguuteqartitsinermit sumiiffinnut suliffissarsiortut piginnaasaasa piumanninnermut tulluarfiinut nuunnissaq ajornannginnerulissaaq, taamaalilluniluunami namminermit suliffeqarnerup iluani suliniutit pitsaasut siuarsarneqarnissaannut iluaqutaassalluni.

Inatsimmi allannguuteqartitsinermit tassani aningaasanut inatsimmi nuttarnerulersitsinissamut ikiorsiissutinut aningaasassat immikkoortinneqartut pitsaanagerusumik atorneqassapput.

2. Siunnersuummi immikkoortut pingaarnerit

Inatsimmut atuuttumut sanilliullugu pingasunik allannguuteqartitsisoqarpoq.

Sulisussat naammattunik piginnaaneqarnissaannik piumasaqaateqarneq aalajangersakkami nutaami peerneqarpoq.

Najukkami sumiiffinni suliffissarsiortunik, sulisitsisut piukkunnassuseqarnissamik piumasaqaatit aalajangersagaannik naammassinninngitsunik peqartoq kommunit misigisarpaat.

Suliffissarsiortutut nalunaarsorsimasut akornanni piukkunneqartut, nuttarnerulersitsinissamut ikiorsiissutinik qinnuteqaateqartoqarsinnaalernissaa sioqqullugu, atorfinnissaq neqeroorutigineqarsimassaaq. Tamatuma malitsigisaanik qinnuteqartut piukkunnaateqartut illoqarfimmit imaluunniit nunaqarfimmit allameersut itigartinneqartarput, taamaalillutillu sulisitsisut atorfik inuttalinngitsoortarlugu. Allannguuteqartitsinermit siunertaavoq, sulisussaq sulisitsisup ugartugaannik immikkut piukkunnassuseqarpat, taassuma sulisussap illoqarfimmit allameersup atorfinitsinnissaa akimmisaaruteqarunnaassasoq.

Aalajangersagaq suliffissarsiortumut, sulisitsisumut aamma najukkami suliffeqarnermut iluaqutaassaaq, tassami taamaaliornikkut nunatsinni nunaqavissunik amerlanerusunik Kalaallit Nunaat tamakkerlugu atorfinitsitsinissaq iluatsittussaavoq.

Tamatuma saniatigut innersuunneqartumut inissaq pillugu aalajangersagaq allatut allanneqarpoq. Maannakkut suliffissarsiortoq nammineerluni inissarsisimaguni tamanna naammappoq. Taamaalilluni inissiaq suliffissarsiortumut innersuunneqarsimassasoq piunasaqataajunnaarpoq. Taamaattoq suliffissarsiortoq attartornermut tunngasumut uppersaammik, assersuutigalugu attartornermut isumaqatigiissut, takutitsisartussaassaaq.

Kommunini ullumikkut suleriaaseq tassaavoq, suliffissarsiortoq sulisitsisuulersussamit inissiamut innersuunneqarsimappat aatsaat nuttarnersitsinissamut ikiorsiissutinik tunniussisoqartarluni, tassami aalajangersagaq allassimammat ”innersuunneqartumut inissaqartitsisoqarpat.”

Tamanna paasineqarpoq inissiaq sulisitsisumit atugassiissutigineqassasoq.

Suliffissarsiortup atorfimmut peqatigitillugu tamatigut inissiamut innersuunneqartannginnera pissutigalugu allanguuteqartitsisoqarpoq. Suliffissarsiortoq nammineerluni inissarsisimatillugu, taamaalilluni nuttarnersitsinissamut ikiorsiissutinik pissarsinissaq ajornassangilaq, taamaalilluni suliffissarsiortup sulisitsisup akiligaanik pigisani nuutissinnaassallugit.

Kiisalu Naalackersuisut ataasiakkaatigut naliliinermikkut sulisussap aningaasartuutaannut matussutissatut tapiissuteqarsinnaasut pillugu aalajangersagaq ilanngunneqarpoq. Aalajangersakkami tassani siunertaavoq, pisunut soorlu atorfinittussanik oqaloqateqarnermut aamma suliffimmi misiliinernut nuttarnersitsinissamut ikiorsiissutinik tunniussisinnaanissaq. Aamma aalajangersagaq naapertorlugu pisuni allani Naalackersuisut inatsimmi siunertat tunngavissinneqartut naliliitillugit, nuttarnersitsinissamut ikiorsiissutinik tunniussisinnaassapput. Sulisussat nunaqavissut suliniutinut taakkununga tapersiivigineqarsinnaappata, Kalaallit Nunaanni suliffeqarnermi nuttarnersitortoqassaaq aammalu assersuutigalugu ilaqutariit pigisallu nuutinissannut annertunerusunik tapiissuteqartoqarnissaa sioqqullugu, sulisitsisut atorfinnut pitsaanerpaamik tulluartunik nassaarnissamut periarfissaqalersinnaallutik.

Siunnersuut Inatsisartut inatsisaannut atuuttumut sanilliullugu	
<p>§ 7. Suliffissanik ataavartuusunik innersuussineq, suliffissarsiortup najukkaminit nuuttariaqarneranik nassataqartitsisoq pisinnaavoq:</p> <p>1) nuunneq suliffeqarnermi najukkami suliamullu tunngatillugu pisariaqartitanik naliliineq aallaavigalugu kissaatigineqartutut isigineqarpat,</p> <p>2) suliffissarsiortoq akuersippat,</p> <p>3) innersuunneqartoq angallanneqarnermut pisattanillu nuussinermut aningaasartuutissinneqassanngippat,</p> <p>4) najugarisami naammattunik piginnaanilinnik sulisussaqaanngippat, aamma</p> <p>5) innersuunneqartoq inissaqartinneqassappat.</p>	<p>§ 1</p> <p>1. § 7, <i>imm. 1</i> imatut oqaasertalerneqassaaq: ” Suliffissanik ataavartuusunik innersuussineq, suliffissarsiortup najukkaminit nuuttariaqarneranik nassataqartitsisoq pisinnaavoq:</p> <p>1) nuunnissaq suliffeqarnermi suliamullu tunngatillugu pisariaqartitanik naliliineq aallaavigalugu kissaatigineqartutut isigineqarpat,</p> <p>2) suliffissarsiortoq akuersippat,</p> <p>3) innersuunneqartoq angallanneqarnermut pisattanillu nuussinermut aningaasartuutissinneqassanngippat, aamma</p> <p>4) innersuunneqartoq inissaqartinneqassappat imaluunniit suliffissarsiortoq nammineerluni inissarsisimappat.”</p>
	<p>2. § 7-imi <i>imm. 4</i>-itut ikkunneqassaaq: ” <i>Imm. 4.</i> Naalakkersuisut ataasiakkaatigut naliliinikkut, <i>imm. 1</i> aamma <i>2</i> malillugit suliffissamik innersuussinermut atatillugu aningaasartuutinut allanut, ilanngullugit assersuutigalugu angalanermut ineqarnermullu aningaasartuutit, atorfinittussanik oqaloqateqarnernut aamma suliffimmi misiliinernut atatillugu suliffissarsiortup akiligai, matussutissatut tapiissuteqarsinnaapput.”</p>
	<p>§ 2</p> <p>Inatsisartut inatsisaat atuutilerpoq ulloq 1. januar 2016.</p>

3. Pisortanut aningaasaqarnikkut allaffissornikkullu sunniutaasussat

Siunnersuut nuttarnersitsinissamat ikiorsiissutinik tunniussinissamat pitsaanerusunik periarfissaqalernermik, taamaalillunilu nuttarnersitsinissamat ikiorsiissutinut

aningaasassat atorneqarnerulernerannik malitseqassasoq naatsorsuutigineqarpoq.

4. Inuussutissarsiortunut aningaasaqarnikkut allaffissornikkullu sunniutaasussat

Allannguutissatut siunnersuummi nuttarnerulersitsinissamut ikiorsiissutinik tunniussinissamut periarfissat pitsaanerulernissaat, taamaalillunilu suliffissarsiertut suliffissat ornillugit nuussinnaanissamut pitsaanerusunik periarfissaqalernissaat qulakkeerseqassaaq. Taamaaliornikkut naliliisoqarpoq allannguut inuussutissarsiertunut pitsaasumik sunniuteqassasoq.

5. Avatangiisinut, Pinngortitamut aamma inuit peqqissusaannut sunniutaasussat

Siunnersuut avatangiisinut, pinngortitamut aamma inuit peqqissusaannut sunniuteqartussatut naatsorsuutigineqanngilaq.

6. Innuttaasunut sunniutaasussat

Siunnersuummi innuttaasut nuttarnerulersitsinissamut aningaasaliissutinik qinnuteqarnissamut pitsaanerusunik periarfissaqartinneqalissasut naatsorsuutigineqarpoq.

7. Sunniutaasussat allat annertuut

Siunnersuut allanik annertuunik sunniuteqassasoq naatsorsuutigineqanngilaq.

8. Oqartussaasunut kattuffinnullu il.il. tusarniaaneq

Siunnersuut piffissami ulloq 18. maj 2015-imiit ulloq 22. juni 2015-imut Namminersorlutik Oqartussat tusarniaanermut nittartagaanniippoq.

Siunnersuut aamma tusarniaaffiusunut makkununga toqqaannartumik nassiunneqarpoq:

GE - Sulisitsisut, NUSUKA, SIK, KANUKOKA, Kommuneqarfik Sermersooq, Qaasuitsup Kommunia, Qeqqata Kommunia, Kommune Kujalleq, IMAK, PIP, Sermitsiaq, ASG, Naalakkersuisut Siulittaasuata Naalakkersuisoqarfia, Aningaasaqarnermut Naalakkersuisoqarfik aamma Ilaqutaariinnermut, Naligiisitaanermut Isumaginninnermullu Naalakkersuisoqarfik.

Tulliuttuni tusarniaanermut akissuteqaatit aamma allannguutissatut siunnersuutit tusarniaanerup nalaani tiguneqartut sammineqassapput. Oqaatigineqassaaq tusarniaanermut akissuteqaatit, uingasunik allassimasut, taamaallaat pingaaruteqassusaannik nalilersuineq tunngavigalugit pingaarnertiguinnaq issuarneqarmata.

Tusarniaanermut akissuteqaatit tamarmik tamakkiisunngorlugit Inatsisartuni ataatsimiititaliamut suliarinnittussamut ilanngullugit nassiunneqarput.

Naalakkersuisut Siulittaasuata Naalakkersuisoqarfia nassiunneqartunut oqaaseqaatissaqarsimannngilaq.

Aningaasaqarnermut Naalakkersuisoqarfik siunnersuummut oqaaseqaatissaqarsimannngilaq.

ASG nassiunneqartunut oqaaseqaatissaqarsimannngilaq.

Sulisitsisut suliffeqarnermi innersuussisarneq pillugu inatsisip allannguuteqartinneqarnissaanut oqaaseqaatissaqarsimannngilaq.

Ilaqutaariinnermut, Naligiisitaanermut Isumaginninnermullu Naalakkersuisoqarfik (ININ) allappoq siunnersuummi § 7, imm. 4-imi, suliffimmi misiliinermut atatillugu nuttarnerulersitsinissamut ikiorsiissuteqarnissaq ajornarunnaarsinneqarmat neriulluarnartoq. Taamaattoq ININ isumaqarpoq, atorfinittussanik oqaloqateqarnernut aamma suliffimmi misiliinernut pimoorusaanngitsunut nuttarnerulersitsinissamut ikiorsiissutinik atuilluni ajornangitsumik atonerluisinnaaneq aalajangersakkap ajornarunnaarsikkaa, aammalu inatsimmi innuttaasut suliffeqalernissamut piareersimasuunngitsut ersarilluannngitsumik taamaallaat ilaatinneqartut.

Tamatuma saniatigut Naalakkersuisut nuttarnerulersitsinissamut ikiorsiissutinik qinnuteqaatinik suliarinnittartussaanerit ININ-ip paasisinnaannngilaa.

Siullermik paasissutissiissutigineqarsinnaavoq, maannamut pisartutut nuttarnerulersitsinissamut ikiorsiissutinik qinnuteqaatit Naalakkersuisunit suliarineqartartussaammata. Tamanna taamaalilluni siunnersuuteqarnermi allannguuteqartinneqannngilaq.

Allannguuteqartitsinermit inatsisip atuuffissaata, innuttaasut suliffeqalernissamut piareersimannngitsut ilaatilerlugit, annertusitinneqarnissaa siunertaannngilaq. Tamanna piginnaangorsaaqqinneq pillugu inatsimmi maleruagassiivigineqartariaqarpoq.

Naalakkersuisut atorfinittussanik oqaloqateqarnissaq aamma suliffimmi misiliinissaq piviusumik pisussaasut eqqortunik uppernarsaatinik pissarsisarnerisigut, aalajangersakkap sutigulluunniit atonerlunneqarnissaa pinngitsoorniarneqarpoq. Innuttaasunit ataasiakkaanit imaluunniit suliffeqarfinit atonerlunneqartoq paasinarsissappat, Naalakkersuisut nuttarnerulersitsinissamut ikiorsiissutinik qinnuteqaatip itigartinnissaanut periarfissaqarput.

Aamma sammisassaq piviusuusoq qulakkeerniarlugu, sammisat nuttarnerulersitsinissamut ikiorsiissutinik tunniussiffigineqartut malinnaaffiginissaat periarfissaqassaaq. Innuttaasoq eqqortunik piukkunnassuseqartoq atorfininnissamut oqaloqatigineqarsimappat aammalu toqqarneqarsimanani, Naalakkersuisut sulisitsisumit tamatumunnga annertuumik tunngavilersuuteqarluarnissaq piumasarissavaat.

Kiisalu ININ allappoq Inatsisartut inatsisaanni allannguuteqartitsineq, nuttarnerulersitsiniarluni tapiissutit pillugit Namminersornerullutik Oqartussat nalunaarutaata nr. 24, 25. august 2008-meersup nutarterneqarneranik malitseqartinneqartariaqaraluartoq.

Inatsisip allannguuteqartinneqarnerata akuerineqareernerata kingorna nalunaarutip nutarterneqarnera pissaaq.

KANUKOKA-p siunnersuut neriulluarnartutut isumaqarfigaa, tassami tamatuma maannakkornit kalaallit sulisartut nuttarnerulersittussaammagit. KANUKOKA allappoq, inatsisissatut siunnersuut qanoq kommuninut aningaasaqarnikkut allaffissornikkullu sunniuteqassanersoq nassuiaatinik siunnersuut imaqaanngitsoq.

Suliassanik suliarinnittarneq maannakkutut Naalakkersuisunit isumagineqartussaammat, taamaalilluni kommunit inatsisissatut siunnersuummut atasunik annertunerusunik aningaasartuuteqartinneqassanngillat imaluunniit allaffissornerulersinneqassanatik. Inuit amerlanerusut sulitilernissai inatsisissatut siunnersuummi siunertaavoq, tamatumalu taamaalilluni kommunini aningaasartuutit aamma allaffissorneq annikinnerulersissavaa, tassami innuttaasut suliffeqaanngitsut allaffissornikkut aqutsivigineqartussat ilitsersorneqartussallu ikinnerulissapput.

Kommuneqarfik Sermersooq allappoq, atorfinittussanik oqaloqateqarnermut imaluunniit suliffimmi misiliinermut atatillugu illoqarfimmiinneq imaluunniit nunaqarfimmiinneq aamma matussuserneqarsinnaassasoq, erseqqissarneqartariaqaraluartoq.

Siunnersuut tusaatissatut tiguneqarpoq aammalu nassuiaatit iluarsineqarlutik.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Aalajangersakkami siunertaavoq Kalaallit Nunaata suliffeqarnertut ataasiinnartut ataatsimoortunngortinnissaata tunngavissinneqarnissaa. Sulisussat nuttarsinnaassusaat suli annertusarneqassaaq, taamaalilluni sulisussat sulisussarsiorfiusunut piviusumik suliffissarsiorsinnaalissallutik.

Ataavartussamik suliffeqarnissaaq pineqarmat, iluatsilluartumik nuunnissamik tunngavissiiisussamik taamaalillunilu suliffeqarnermi pitsaanerusemik akuulernissamut sulisussamut piumasaqaateqartoqarpoq. Suliffissarsiortut inuuneranni annertuumik allannguuteqartoqarnissaa pineqarmat, suliffissarsiortup nuunnissamut akuersinissaa piumasaqaatigineqarpoq.

Inissaqartitsisoqarsimasinnaavoq imaluunniit suliffissarsiortoq nammineerluni inissarsiornissamut periarfissaqarluni. Inissaqarnissamut piviusumik periarfissaqarluni sulisussaaq uppersaammik takutitsissaaq, assersuutigalugu attartornissamut isumaqatigiisummik takutitsinermigut.

Nr. 2-imut

Aalajangersakkami siunertaavoq pisussanut soorlu atorfinittussanik oqaloqateqarnermut imaluunniit sulilluni misiliinermut angalanermut aningaasartuutinut tapiissuteqarnissamut periarfissiinissaaq. Aamma assersuutigalugu atorfinittussanik oqaloqateqarnerup aamma suliffimmi misiliinerup nalaanni unnuinermut tapiissuteqartoqarsinnaavoq. Pissutsit taaneqartut tamakkiisuunngillat.

Atorfinittussanik oqaloqateqarnissamut qinnuteqartut amerlaneruppata, sulisitsisoq atorfinnut pitsaanerpaamik tulluurtumik nassaarnissamut periarfissaqalissaaq. Taamatuttaaq sulilluni misiliineq aalajangersimasumik atorfinitsitsinermik kinguneqassanersoq nalilernissaanut, sulilluni misiliineq suliffissarsiortumut sulisitsisumullu periarfissiisaaq.

Allannguuteqartitsinermi assersuutigalugu ilaqutariit pigisallu nuotinnissaannut annertunerusemik tapiissuteqartoqannginnerani, suliffissarsiortumut sulisitsisumullu periarfissat pitsaanerpaat paasinarsisinneqassapput.

§ 2-imut

Aalajangersagaq siunnersuutip piffissaaq atuutilerfissaanut tunngassuteqarpoq.

Siunnersuutigineqarpoq inatsit ulloq 1. januar 2016 atuutilissasoq.